

■ TRIBUNA POLITICA

Betg spetgar miraclas d'ordaifer

DA SILVA SEMADENI,
CUSSEGLIERA NAZIUNALA

En il Puschlav datti in project interessant. El sa numna «100% Valposchiavo» e sa basa sin in meglier diever da las atgnas resursas. Cun quai s'avran novas perspectivas, surtut per l'agricultura ed il mastern. Da l'entschatta s'obligheschan diesch ustarias da conceder a products locals in spazi spezial en lur purschida. Dapi quest onn chattan ins sin las cartas da menu da quests restaurants almain trais tratgas preparadas entirain cun products locals. Ils purs èn envidads a diversifitgar lur cultivaziun e furnir ils products alimentars giavischads. Dumandada è farina da seghel indigena per la tipica bratschadella dal Puschlav, graun saracen indigen per far pizzoccheri, farina alva indigena per producir ils enconuschents spaghettis lungs dal mulin da Poschiavo. La farina ed il graun na duain pli derivar da l'UE u or da l'USA. Ed 87% dals purs dal Puschlav èn oz purs da bio. La finamira è 100% bio. La cultivaziun biologica garantesch a auta qualitat. La nova chascharia bio cun ses products multifars è gia sin buna via. Il medem vala per la cultivaziun dad ervas tradiziunalas. Er autras interpresas survegnan schanzas:



las mazlarias, l'economia da laina, l'artisanat ed autras interpresas da la masternanza «100% Valposchiavo» e «100% bio» distinguon products locals da fitg auta qualitat. Sin il martgà èn tshertgads sco che la vendita dal té bio dal Puschlav conferma. Quests products èn er adattads fitg bain per l'export e sa cunfan medemamain cun in turissem en accord cun la natira ed in summa per il svilup turistic da la Val.

Grazia a quest project survegn la populaziun ina finamira cuminaivla vi da la quala ella po s'orientar. La confidenza en sasez, la conscienza da la valur e da la muntada da las atgnas resursas vegnan rinforzadas grazia a l'intent cuminaivel. Era la cultura e la natira profitan da novas iniziativas multifaras. Beneventada è plinavant la collavuraziun dals differents acturs e secturs. E betg il davos profitan ils pioniers, ils em-

prims purs da bio, gia baud persuas da lur via, da la renconuschientscha meritada.

Igl n'è betg uschia che l'avegnir è da chasa mo en las citads. Las regiuns da muntogna èn pertutgadas da la depopulaziun e savens bandunan nus las megras forzas. I dat dentant era schanzas ch'ins sto vesair e trair a niz. Il project «100% Valposchiavo» è in project losch, confident en sasez, che sa basa sin atgnas forzas. Ins fa betg lamentaziuns, ins spetga betg las miraclas d'ordaifer. Il project vul augmentar la valur agiuntada locala e salvar il pli lunsch pussaivel la plivalur en la Val. Uschè simpel è il concept.

Igl è in concept che vala era per auters projects, uschia era per il project anc pli ambizius dal Parc Adu-la. Era qua sa preschantan schanzas per in meglier diever da las atgnas resursas, per in svilup fundà sin atgnas iniziativas. In parc naziunal è ina finamira cuminaivla, in far per las regiuns. Parcs naziunals èn giavischads era per la Svizra. Il sustegn da confederaziun e chantun è garantì. Jau speresch che las regiuns pertutgadas nizzegian questa schanza unica e na sa lachan betg starmentar dad arguments reacziunaris senza perspectivas.